

समां - 12:25 hrs.

<><><><><><>

LG- Wild Life

उपराज्यपाल मनोज सिन्हा होरें कल लोकभवन च वन्यजीव बोर्ड दी 6मीं बैठक दी अध्यक्षता करदे होई केई परियोजनाएं लेई मैहकमे दी मंजूरी दिती- जिंदे च जल-जीवन मिशन दे कम्म- सीमा सुरक्षा चौकियां- फोर-जी दी सभ्भनें थाहरें उपलब्धता- बिजली सप्लाई दी तारें दे लंगने दी मंजूरी- मैहकमा बागवानी दियें नर्सरियें लेई मंजूरी ते ल्हास पौने बारे सौहगा करने गितै सरिस्ते लेई क्लीयरेंस बगैरा शामिल न। एहदे इलावा बैठका च वन्यजीव संरक्षण सरबंधि उपाएं- जंगली जानवरें दे माहनू पर हमले जनेइयें घटनाएं दे प्रबंधन सरबंधि मुद्दें पर बी गल्लबात कीती गई। एल.जी होरें विशेष तौरा पर जैविक बन-सबन्नता दे टिकाऊ प्रबंधन- कुदरत दे अनुकूल सैलसफा गी बढ़ावा देने- जिंदे च प्रोत्साही गतिविधियें टकोहदा करियै स्कूली बच्चें गी शामिल करियै बढ़ावा देना शामिल ऐ- पर बी जोर दिता- जियां जे उनेंगी जाम्बू-जू होकर सर ते घराना वैट्लैंड पिकनिक पर लेना वगैरा। बोर्ड आसेया मीटिंगें च जानकारी दिती जे हंगुल दी अबादी जेहड़ी 2008 च छड़ी 127 ही हून 2025 च 323 होई गेदी ऐ।

<><><><><><>

Dy. CM Sports

उपमुख्यमंत्री सुरिंदर चौधरी होरें आखेया ऐ जे जम्मू-कश्मीर सरकार इत्थै खेड्डें गी बढ़ावा देने बक्खी चेचा ध्यान देआ रदी ऐ ते केन्द्र शासित प्रदेश दे सब्बन जिलें च अंतराष्ट्रीय स्तरें दा खेड्ड ांचा विकसित करने लेई पूरी चाल्ली वचने बज्झी दी ऐ- तां जे युवा खडारियें गी कुल संसारी सतह दे खेड्ड मकाबलें लेई तयार कीता जाई सकै। कल जम्मू दे एम.ए स्टेडियम च 29मीं यू.टी बिलियर्ड्स एंड स्नूकर चैम्पियनशिप 2025 दे समापन समारोह च बतौर मुख परौहने शिरकत करदे होई उपमुख्यमंत्री होरें चैम्पियनशिप दे जेतुं ते होरनं प्रतिभागियें गी सम्मानित बी कीता। तोंआई उनें पैहली जनवरी 2026 तोड़ी चलने आहली 17मीं जूनियर रोल बॉल राष्ट्रीय चैम्पियनशिप 2026 दा औपचारिक उघाटन बी कीता।



JKPSC Report

जम्मू-कश्मीर लोक सेवा आयोग (JKPSC) नै 2024-25 बरे लेई अपनी 66मीं सलाना रिपोर्ट जम्मू लोक भवन च उपराज्यपाल मनोज सिनहा होरें गी पेश कीती। आयोग दे चेयरमैन अरुण कुमार चौधरी हुंदी अगुआई च उपराज्यपाल हुंदे कन्नै मलाटी दौरान JKPSC दे प्रतिनिधिमंडल नै प्रमुख प्रशासनिक सुधारें पर लौऽ पाई ते आयोग दे कम्मकाज बारे जानकारी दिती। उपराज्यपाल होरें ईमानदारी दे उच्चे मानकें गी बनाई रखने ते इक निरपक्ख योग्यता आधारित ते पारदर्शी चुनां प्रक्रिया गी बनाने आस्तै JKPSC दी सराहना कीती। आयोग दे चेयरमैन चौधरी होरें मेदवारें लेई औने आहली SMS

अधिसूचना प्रणाली सनै तकनीकी पैहलकदमियेँ बारे जानकारी दिती। पेश कीती गेदी रिपोर्ट च विभागीय तरक्की- भर्ती नियम ते बरे दौरान कीते गेदे चयनेँ गी बी शामिल कीता गेदा ऐ।



Year Ender Reforms

बरा 2025 भारत दी वैश्विक यात्रा च ऐतिहासिक रेआ- जेहदे च प्रधानमंत्री नरेन्द्र मोदी होर इक प्रमुख अंतराष्ट्री शख्सियत दे रुपै च उब्भरे। कुल संसारी आर्थिक ते भू-राजनीतिक अनिश्चितता दे चलदे भारत नै महत्वपूर्ण आर्थिक सुधारें ते दुनिया भरै च बपार सरबन्धें दे विस्तार दे चलदे सकल घरेलू उत्पाद दी 8 इशारिया 2 फीसदी दी मजबूत विकास दर हासल कीती ऐ। भारत नै ब्रिटेन- EFTA देशें- ओमान ते न्यूजीलैंड कन्ने बड्डे मुक्त बपार समझौतें पर दस्तखत कीते न- जेहदे कन्ने भारतीय उत्पादें लेई नमें बजार खुल्लगंन। सुरक्षा आहली बक्खी भारत नै आतंकवाद खलाफ सख्त रौं अपनाए दा रक्खेया ते आप्रेशन सिंदूर दौरान इसी व्यापक अंतराष्ट्री मान्यता बी हासल होई। प्रधानमंत्री मोदी होरें रिकार्ड 29 अंतराष्ट्री पुरस्कार बी इस दौरान हासल कीते ते केई विदेशी संसदें गी सम्बोधित करदे होई “ग्लोबल साउथ” दी आवाज गी होर अग्गे बधाया। दुनिया दे नेताएं ते कुल संसारी विचारकें उंदे नेतृत्व दी सराहना करदे होई कुल संसारी मंच पर भारत दे बधदे प्रभाव गी उजागर कीता।



High Alert

जम्मू-कश्मीर च नमैं बरे दे जश्न-समारोहें गी ध्यानैं च रखदे होई अंतराष्ट्रीय बन्ने ते नियंत्रण रेखा पर बी हाई-अलर्ट जारी करी दिता गेदा ऐ तां जे बन्ने पारा कुसै चाल्ली दी बिघ्न पाने दी कोशश गी नाकाम कीता जाई सकै। कठुआ- साम्बा- अखनूर- गुरेज- उड़ी- करनाह ते टंगधार सैक्टरें च चेचे तौरा पर सुरक्षा बंदोबस्त निगगर करदे होई दिन-रात गश्त- डिजीटल सरिस्ते राए निगरानी- आधुनिक तारबंदी ड्रोन ते रोबोट उपकरणें दी मदद कन्नै सारे इलाके च हर नक़्शोहरकत पर नेड़मी तक्क रखी जा रदी ऐ ते बन्ने पारा घुसपैठ दी कुसे बी कोशश गी नाकाम करने लेई उत्थे तनात बल पूरी चाली त्यार न।

<><><><><><>

Winter Carnival

अज्ज शुरु होआ रदे पत्नीटॉप -सनासर विंटर कार्निवाल लेई त्यारियें गी मुकदा रुप देई दिता गेदा ऐ- जिस दौरान इनें दौनें थाहरें पर ठंडू दे मौसम च गीत-संगीत ते मौजमस्ती दा पूरा बंदोबस्त कीता गेदा ऐ। नमैं बरे दे सुआगत गितै आयोजित कीते जा रदे दंऊ दिनें दे इस समारोह च नाच-गाणा- मनोरंजन ते साहसिक गतिविधियां ते बर्फू कन्नै खटोए दे आले-दोआले दे मझाटे खाने-पीने दी बवस्था बी कीती गेदी ऐ।

<><><><><><>

Weather

जम्मू प्रांतै च ठंडू दा प्रकोप बरोबर जारी ऐ। जम्मू शैहर ते एहदे आले-दोआले दे इलाकें च अज्ज बड़डलै बी घनी धुंध कारण आओ-जाई च टकोहदा करियै गड़्डी चलाने च दिक्कत

पेश आवा करदी ऐ। बड्डलै सैर करने आहलें दी गिनतरी बी दना घट्ट दिक्खी गेई ते केई
थाहरें लोकेँ गी अग्ग बाल्लियै ओहदे चबक्खियां बैठे दे दिक्खेया गया। तोंआई मौसम
विभाग नै अज्जै थमां जम्मू-कश्मीर दे केई इलाकेँ च बरखा दे आसार दस्से न।

<><><><><><>